

RITSTJÓRNARPISTILL

Ágæti lesandi.

Fræðslumiðstöð atvinnulífsins (FA) gefur nú út fimmta tölu-
blað af Gátt, ársriti um fullorðinsfræðslu og starfsmenntun.
Hlutverk Fræðslumiðstöðvarinnar er að vera samstarfsvett-
vangur stofnaðilanna, Alþýðusambands Íslands og Samtaka
atvinnulífsins, í viðtæku samstarfi um símenntun á íslenskum
vinnumarkaði. Samstarfið nær til þróunar nýrra aðferða til að
efla þekkingu og færni fólks á vinnumarkaði sem og fram-
kvæmdar samstarfsverkefna. Með Gátt gefst tækifæri til að
skapa vettvang fyrir umræðu um þau verkefni, viðhorf og
kenningar sem eru efst á baugi hverju sinni.

Markmið ritsins eru sem fyrr að efla umræðu um full-
orðinsfræðslu og starfsmenntun á Íslandi, miðla reynslu og
kynna það sem ber hæst í umræðunni hverju sinni. Mark-
mið FA er að í Gátt birtist úrval greina um hvaðeina sem
varðar nám og fræðslu fullorðinna. Ritið er ætlað viðum hópi
í samfélaginu: Þeim sem stjórna og vinna að fræðslumálum,
leiðbeinendum, kennurum og námsmönnum og síðast en
ekki síst öllum öðrum sem hafa áhuga á að kynna sér nýj-
ungar og helstu sjónarmið í fræðslu fullorðinna.

Hjá Fræðslumiðstöð atvinnulífsins er unnið að fjöl-
breyttum verkefnum bæði innlendum og erlendum og er
greint frá nokkrum þeirra hér í ritinu. FA fagnaði fimm ára
afmæli sínu árið 2007 og þótti því við hæfi að líta um öxl
og leggja mat á þann árangur sem náðst hefur. Hróbjartur
Árnason leitast einmitt við í grein sinni hér í ritinu að svara
spurningunni um það hvort Fræðslumiðstöðin hafi gengið til
góðs.

Meginefni ritsins eru gæði og gæðaviðmið í fullorðins-
fræðslu. Þó svo að gæði séu oft metin út frá reynslu ein-
staklingsins má einnig skilgreina þau út frá fyrirfram gefnum
viðmiðum eða stöðlum. Eitt af skilgreindum verkefnum
Fræðslumiðstöðvarinnar er að efla gæði í fullorðinsfræðslu
og hefur FA gefið út drög að gæðaviðmiðum sem samstarfs-
aðilar og aðrir sem sinna fullorðinsfræðslu geta stuðst við.
Hér í ritinu er nánar fjallað um gæðaviðmið FA, þörfina fyrir
hlutlæg viðmið um gæði og gæðavottun í fullorðinsfræðslu
og sagt er frá aðferðum fræðsluaðila við að efla gæði starf-
semi sinnar. Gæði eru ofarlega á baugi í norrænu samstarfi
um fullorðinsfræðslu og í ritinu er umfjöllun um skýrslu og

ráðstefnu sem haldin var á vegum NVL um gæði í fullorðins-
fræðslu. Þá birtast einnig hugleiðingar um hvað skapi gæði í
fjarkennslu. Auk þessa er sagt frá upplifun einstaklinga af því
að hefja nám að nýju og reynslu fræðsluaðila af nýrri nálgun
í íslenskukennslu fyrir útlendinga.

Í ritinu er að vanda greint frá starfsemi FA og verkefnum
sem unnið hefur verið að á árinu 2008. Öll miða þessi verk-
efni að því að auka færni fólks á vinnumarkaði og efla full-
orðinsfræðslu og starfsmenntun á Íslandi. Eins og fyrr telur
ritstjórnin sig afar lánsama að hafa fengið til liðs við sig
breiðan hóp fólks við skriftirnar. Í hópi greinahöfunda eru
fræðsluaðilar, leiðbeinendur, náms- og starfsráðgjafar og
sérfræðingar af ýmsu tagi. Ritstjórnin vonar að ritið verði
kærkomin lesning þeim sem koma að námi fullorðinna og
hún hvetur lesendur til að láta skoðanir sínar í ljós, koma
með ábendingar og hugmyndir og taka þannig virkan þátt í
því að efla fullorðinsfræðslu og starfsmenntun á Íslandi.

Ritstjórn